

宋史新編

宋史新編卷一

本紀一

明南京戶部主事莆田柯維騏著

本紀

太祖

太祖啓運立極英武睿文神德聖功至明大孝皇帝諱
匡胤姓趙氏涿郡人高祖眀是爲僖祖唐幽都令眀生
昫是爲順祖歷藩鎮從事兼御史中丞昫生敬是爲翼
祖涿州刺史敬生弘殷是爲宣祖少驍勇善騎射事趙
王王鎔將五百騎援唐莊宗于河上有功莊宗留典禁
軍漢乾祐中討王景於鳳翔會蜀兵來援戰于陳倉始

合矢集左目氣彌盛奮擊大敗之遷護聖都指揮使周廣順末累遷右廂都指揮使領岳州防禦使從征淮南前軍却吳人來乘邀擊敗之顯德三年督軍平揚州累官檢校司徒天水縣男與太祖分典禁兵一時榮之卒贈武清軍節度使太尉宣祖娶杜氏是爲昭憲皇后後唐天成二年二月十六日生太祖於洛陽夾馬營赤光繞室異香經宿不散旣長容貌雄偉器度豁如識者知非常人初應募居周社帳下廣順中拜滑州副指揮轉開封府馬直軍使顯德元年從世宗戰高平敗漢兵還拜殿前都虞候三年從征淮南南唐節度皇甫暉姚鳳

衆號十五萬太祖手刃哱并擒鳳尋敗齊王景達于六合東斬首萬級連拜定國軍節度使四年春從征壽州下之還拜義成軍節度檢校太保仍殿前都指揮使冬從征濠泗又下之五年改忠武軍節度使六年世宗北征爲水陸都部署降其守將戰却數千騎關南平世宗在道閱文書得韋囊中有木三尺餘題云點檢作天子時張永德爲點檢卽命太祖代永德世宗崩子宗訓立改太祖歸德軍節度檢校太尉會北漢結契丹入寇命出師禦之乃七年正月癸卯發汴京時周帝幼將士陰謀推戴軍中知星者苗訓視日下復有一日黑光摩盪

者久之語太祖親吏楚昭輔曰此天命也次陳橋驛夜五鼓軍士集驛門宣言策點檢爲天子遲明逼寢所太宗與掌書記趙普入白太祖起諸校露刃列于庭曰諸軍無主願策太尉爲天子卽被以黃袍羅拜呼萬歲掖乘馬太祖攬轡謂之曰我有號令汝能從乎皆下馬曰唯命太祖曰太后主上吾皆北面事之不得驚犯大臣皆我比肩不得侵凌朝廷府庫士庶之家不得侵掠用令有重賞違卽拏戮汝皆載拜肅隊以入副都指揮使韓通謀禦之軍校王彥昇遽殺通於其第太祖進登明德門令甲士歸營乃退居公署有頃諸將擁宰相范質

等至太祖見之流涕曰違負天地今至于此質等未及對列校羅彥瓌按劒厲聲曰我輩無主今日須得天子質等相顧計無從出乃降階列拜召文武百僚至脯班定翰林承旨陶穀袖中出周帝禪詔曰天生烝民樹之司牧二帝惟公而禪位三王乘時而革命其極一也予末小子遭家不造人心已去天命有歸咨爾歸德軍節度使殿前都點檢趙匡胤稟上聖之姿有神武之略佐我高祖格于皇天逮事世宗功存納麓東征西怨厥績懋焉天地鬼神享于有德謳歌獄訟歸于至仁應天順人法堯禪舜如釋重負予其作賓嗚呼欽哉祇畏天命

宣徽使引太祖北面拜受掖升崇元殿服袞冕卽皇帝
位遷周帝及符后于西宮易其帝號曰鄭王尊符后爲
周太后

建隆元年春正月乙巳大赦改元定有天下之號曰宋
中外百官加恩軍士賞賚有差戊申詔曰易姓受命王
者所以應期臨難不苟人臣所以全節周故天平軍節
度使檢校太尉同平章事侍衛親軍馬步軍副都指揮
使韓通振迹戎伍委質前朝彰灼茂功踐更男爵夙定
交於霸府遂接武於查門艱險共嘗情好尤篤朕以三
靈睠祐百姓樂推言念元勳將加殊寵蒼黃遇害良用

憮然可贈中書令以禮收葬辛亥論翼戴功以周義成
軍節度使殿前都指揮使石守信汝寧軍節度使侍衛
親軍馬軍都指揮使高懷德武信軍節度使侍衛親軍
步軍都指揮使張令鐸殿前都虞候王審琦虎捷右廂
都虞候張光翰龍捷右廂都指揮使趙彥徽及凡領軍
者進爵有差以弟光義爲殿前都虞候領睦州防禦使
趙普爲右諫議大夫樞密直學士乙卯遣使分賑諸州
己未以生日爲長春節癸亥以周天雄軍節度使魏王
符彥卿雄武軍節度使王景定難軍節度使西平王李
彝興荆南節度使高保融及凡領節鎮者進爵有差己

已立太廟二月乙亥尊母杜氏爲皇太后以周司徒兼
門下侍郎同中書門下平章事范質尚書右僕射兼門
下侍郎同中書門下平章事王溥行中書侍郎同中書
門下平章事魏仁浦樞密使吳廷祚並依前加官有差
庚寅進士楊礪等賜第有差自是歲貢舉三月丙辰南
唐主李景吳越王錢俶遣使以御服錦綺金帛來賀壬
戌定國運以火德王色尚赤臘用戊夏四月癸酉判太
常竇儼上二舞十二樂曲名樂章癸巳昭義軍節度使
李筠結北漢起兵據澤州遣歸德軍節度使石守信等
率兵討之五月己亥朔日有食之庚子遣昭化軍節度

使慕容延釗彰德軍節度使王全斌將兵出東道與守信會討李筠壬寅竇儼上太廟舞曲名癸卯石守信敗李筠于長平甲辰命諸道進討丁巳詔親征李筠以樞密使吳廷祚留守上都弟都虞候光義爲大內都點檢命天平軍節度使韓令坤屯兵河陽己未帝發京師丁卯李筠率衆迎戰石守信高懷德大破之擒其將范守圖殺北漢援兵之降者數千人筠遁入澤州王師圍之六月辛未拔澤州筠赴火死癸酉有星赤色出心乙酉帝進伐上黨時筠子守節守之丁亥守節以城降赦之帝如潞甲午未安軍節度使折德辰破北漢沙谷砦秋

七月戊申帝至自潞乙丑南唐進白金賀平澤潞隨進
乘輿御服物是月荆南節度使高保融卒弟存勗嗣知
軍事八月壬午以光義領泰寧軍節度使甲申立王氏
爲皇后戊子以趙普爲樞密副使是月詔有司定權衡
頒之九月丙午上四代帝后徽號及廟謚語在禮志已
未淮南節度使李重進起兵於揚州遣石守信等率兵
討之冬十月丁亥詔親征十一月丁未王師薄揚州城
拔之重進盡室自焚戊申南唐臣杜著薛良來奔帝疾
其不忠斬著配良爲牙校庚申南唐主遣子從鎰來朝
十二月丁亥帝至自揚辛卯泉州節度使留從效稱藩

是歲帝幸國子監脩文宣王廟三佛齊國來貢

二年春正月壬子商州鼠食苗詔免賦帝謂宰臣曰比
命使度田多邀功弊民當慎其選以見朕意二月荆南
高存勗南唐李景各進禮物夏四月癸巳朔日有食之
六月甲午皇太后杜氏崩秋七月壬申以光義爲開封
府尹光美行興元尹八月甲辰南唐主李景卒子煜嗣
已酉執易定節度使孫行友九月壬戌朔南唐李煜遣
使進金幣冬十月丙午葬明憲杜太后于安陵是歲宴
射玉津園迎春苑畋近郊自是歲屢幸其幸玉津園也
謂侍臣曰沉湎非令儀朕宴偶醉恒悔之女真占城回

鵬三佛齊來貢

三年春正月甲戌廣皇城二月庚寅詔文班官舉堪爲
賓佐令錄者各一人不當者連坐甲午詔自今百官朝
對須陳時政利病無以觸諱爲懼己亥詔曰王者禁人
爲非乃設法令臨下以簡必務哀矜世屬亂離則糾之
以猛人知恥格則濟之以寬竊盜之生本非巨蠹近朝
立制重於律文甚非愛人之旨自今竊盜贓滿五貫足
陌者死壬午帝謂侍臣曰朕欲武臣盡讀書以通治道
何如左右不知所對三月己巳詔申律文諭郡國犯大
辟者刑部審覆夏四月泉州節度使留從效卒牙將陳

洪進執其子紹鉉歸于唐推張漢思爲留後五月乙酉以諸州旱減膳徹樂六月癸巳吳廷祚罷爲雄武軍節度使秋八月乙未詔諸行賂獲薦者許告訐詔舉書判拔萃科九月壬申脩武成王廟冬十月辛丑以趙普爲樞密使十一月荆南節度使高存勗卒保融子繼沖嗣知軍事十二月甲辰衡州刺史張文表叛是歲周鄭工出居房州吐蕃效順歸伏羌縣地高麗女真占城回鶻三佛齊來貢蒲晉慈隰相衛諸州饑振之

乾德元年春正月庚申遣山南東道節度使慕容延釗等率十州兵以討張文表二月壬辰湖南節度使周保

權遣將裒文表于朗陵市遂出軍澧州以拒王師保權
兵潰還朗州甲午荆南節度使高繼沖請歸朝得州三
縣十七三月戊寅慕容延釗克朗州擒周保權湖南平
得州十四監一縣六十六夏四月庚寅鑿習戰池辛卯
建隆應天曆成壬辰賞湖南立功將士癸卯辰錦敏等
州歸順甲辰夏州李彝興遣使來貢是月泉州陳洪進
幽張漢思代爲留後五月乙丑廣大內秋七月甲戌釋
周保權以爲千牛衛上將軍己卯班重定刑統等書冬
十月以高繼沖爲武寧軍節度使十一月甲子有事南
郊大赦改元百官上尊號十二月辛巳親王宰相樞密

使以下各進階勳爵邑自是郊祀行慶爲定制甲申皇后王氏崩辛未改卜安陵于鞏縣是冬吳越錢俶南唐李煜泉州陳洪進各獻郊祀禮物萬計自是大禮竝如之是歲諸州置通判以常參官知縣事節度使石守信高懷德王審琦張令鐸張光翰趙彥徽各罷宿衛兵權女真貢名馬及海東青

二年春正月辛巳諭郡國長吏勸農戊子罷范質爲太子太傅王溥爲太子太保魏仁浦爲尚書左僕射庚寅以趙普爲門下侍郎同中書門下平章事李崇矩爲樞密使夏四月丁未朔置制舉三科不限官庶許直詣閣

門進狀乙卯葬昭憲杜太后孝明王皇后于安陵乙丑
始置參知政事以薛居正呂餘慶爲之壬申徙永州諸
縣民之蓄蠱者三百二十六家于縣之僻處不得復齒
于鄉五月己卯知制誥高錫坐受賂貶辛巳宗正卿趙
礪坐贓杖除籍六月己酉弟光義光美竝進秩子德昭
授貴州防禦使秋七月辛卯詔翰林學士陶穀竇儀等
舉堪爲藩郡通判者各一人不當者連坐九月乙未幸
北郊觀稼冬十一月甲戌命忠武軍節度使王全斌爲
西川行營前軍兵馬都部署武信軍節度使崔彥進副
之將兵三萬出鳳州道江寧軍節度使劉光義亦爲西

川行營前軍兵馬都部署樞密承旨曹彬副之將兵二萬出歸州道以伐蜀明日宴諸將于崇德殿示川峽地圖授攻取方略賜賚有差是歲陝州饑遣使振之靈武饑轉涇粟以饒回鶻來貢

三年春正月乙酉蜀主孟昶降得州四十五縣一百九十八戶五十三萬四千三十有九二月壬寅朔日當食不食夏四月癸丑職方員外郎李岳坐贓棄市六月甲辰以孟昶爲中書令秦國公庚戌秦國公孟昶卒秋八月籍郡國驍勇兵補禁衛是歲于闐回鶻高麗來貢四年春二月長春節甘露降江寧府迄開寶甘露降凡

三三月癸未曾行勤等一百五十七人各賜錢三萬遊
西域夏四月壬子罷光州貢鷹鵠五月甲戌光祿少卿
郭玘坐賊棄市壬午澶州貢麥兩岐至六岐者百六十
五本六月己酉果州貢禾一莖十三穗冬十月辛酉朔
命太常復二舞是歲于闐占城來貢

五年春正月甲寅王全斌崔彥進王仁贍竝坐伐蜀贖
貨殺降貶丁巳賞伐蜀功曹彬劉光義等進爵有差二
月乙丑以沈義倫爲樞密副使三月乙巳詔諸道舉部
內官吏才德優異者丙午以趙普爲尚書右僕射兼門
下侍郎同中書門下平章事丙辰五星聚奎夏六月戊

午朔日有食之秋七月巳酉免水旱災戶今年租遂爲
定制八月甲申河溢入衛州城九月壬辰倉部員外郎
陳郾坐贓棄市是月夏州李彝興卒子克勗嗣冬十二
月癸酉同平章事趙普母喪去位越三日起復是歲并
牂西南蕃來貢

開寶元年春正月甲午陝絳懷州饑振之二月立宋氏
爲皇后三月詔曰造士之選非樹私恩世祿之家宜敦
素業如聞黨與頗容竊吹文衡公器豈宜斯濫自今舉
人凡關食祿之家委中書覆試是月有馴象自至京師
夏五月以盛暑手詔諸州恤刑語在刑法志六月癸亥

詔荆蜀民祖父母父母在者子孫不得別財異居秋七月戊申北漢主劉鈞卒養子繼恩立八月戊辰命昭化軍節度使李繼勳等率兵伐北漢九月辛巳朔禁錢出塞癸未監察御史楊士達坐鞠獄濫殺棄市庚子李繼勳敗北漢兵于銅渦河己酉北漢供奉官侯霸榮弑其主繼恩鈞養子繼元立冬十一月癸卯日南至有事南郊改元大赦百官上尊號十二月己酉朔日有食之乙丑大食國來貢

二年春二月乙卯命昭化軍節度使李繼勳爲河東行營前軍都部署侍衛步軍指揮使党進副之宣徽南院

使曹彬爲都監棣州防禦使何繼筠爲石嶺關部署進
雄軍節度使趙贊爲汾州路部署以伐北漢又命彰德
軍節度使韓仲贇爲北面都部署彰義軍節度使郭延
義副之以防契丹戊午詔親征三月己巳契丹主述律
遇弒卒子賢立夏四月己未何繼筠敗契丹援兵於陽
曲五月癸未韓仲贇敗契丹於定州北閏五月壬子議
班師六月癸巳帝至自太原冬十月庚寅散指揮都知
杜延進等謀叛伏誅夷其族是歲王彥超武行德楊廷
璋白重贊郭從義俱罷節鎮爲諸衛上將軍西南夷回
鶻于闐來貢

三年春正月辛酉詔民五千戶舉孝弟彰聞德行純茂者一人奇才異行不拘此限里閭郡國遞審連署以聞仍爲治裝詣闕三月辛亥賜處士王昭素國子博士致仕夏四月辛未朔日有食之秋九月己亥命潭州防禦使潘美爲貴州道兵馬行營都部署朗州團練使尹崇珂副之發十州兵以伐南漢冬十月庚辰克賀州十一月壬寅下昭桂二州乙巳詔曰古者不貴難得之貨後代賦及山澤上加侵削下益彫弊每念此事深疚于懷未能捐金於山豈忍奪人之利自今桂陽監歲輸課減三分之一癸丑右領軍衛將軍石延祚坐賊棄市癸亥

田欽祚敗契丹於遂城是歲女真來貢

四年春正月丁未右千牛衛大將軍桑進興坐賊棄市
二月己丑潘美克廣州俘其國主劉鋹廣南平得州六
十縣二百十四戶十七萬二百六十三夏四月丙寅前
左監門衛將軍趙玘訴宰相趙普汝州安置壬辰監察
御史閻丘舜卿坐賊棄市五月丁酉賞廣南功潘美尹
崇珂等進爵有差六月壬午以孝子羅居通爲延州主
簿封劉鋹爲恩赦侯冬十月癸亥朔日有食之庚午太
子洗馬王元吉坐賊棄市十一月己未日南至有事南
郊大赦壬戌蜀班內殿直四十人援御馬直例乞賞擢

登聞鼓帝命杜之翌日悉斬于營是歲三佛齊來貢

五年春正月庚子前盧縣尉鄢陵許永年七十五自言
父瓊年九十九兩兄皆八十餘乞一官以便養因召瓊
厚賜之授永鄢陵令庚寅以劉熙古參知政事三月乙
酉殿中侍御史張穆坐贓棄市夏五月辛未河決濮陽
命潁州團練使曹翰往塞之語在河渠志甲戌以霖雨
出後宮五十餘人六月河決陽武汴決穀熟害民田振
之詔曰近者澶濮等數州霖雨荐降洪河爲患朕以屢
經決溢重困黎元每閱前書詳究經瀆至若夏后所載
但言導河至海隨山濬川未聞力制湍流廣營高岸自

戰國專利堙塞故道小以妨大私而害公九河之制遂
隳歷代之患弗弭凡縉紳多士草澤之倫有素習河渠
之書深知䟽導之策若爲經久可免重勞並許詣闕上
書附驛條奏朕當親覽用其所長勉副詢求當示甄獎
秋七月己未朔右拾遺張恂坐賊棄市九月丁巳朔日
有食之癸酉李崇矩罷爲鎮國軍節度使是歲大饑高
麗占城三佛齊來貢

六年春三月乙卯朔周鄭王殂于房州上素服發哀謚
曰恭帝庚申覆試進士於講武殿乃賜第自是進士殿
試遂爲定制乙亥翰林學士李昉坐知貢舉失當責授

太常少卿夏四月丁亥召開封尹光義天平軍節度使
石守信等賞花習射於苑中內午黎州保塞蠻來歸五
月庚申劉熙古以戶部尚書致仕是月武寧軍節度使
高繼沖卒六月庚戌詔參知政事與宰相趙普分知印
押班奏事秋八月甲辰趙普罷爲河陽三城節度使九
月丁卯呂餘慶罷爲尚書左丞己巳封光義爲晉王進
德昭同中書門下平章事薛居正爲門下侍郎同平章
事沈義倫爲中書侍郎同平章事盧多遜參知政事壬
申詔曰周之宗盟異姓爲後此先王所以睦九族而和
萬邦也晉王親賢莫二位望俱崇方資夾輔之勳俾先

三事之列宜位宰相上冬十月甲申葬周恭帝于順陵
不視朝十一月癸丑詔常參官進士及第者各舉文學
一人十二月丙午參知政事盧多遜父喪起復行開寶
通禮是歲占城交趾來貢交趾自此內附

七年春二月庚辰朔日有食之丙戌日有二黑子乙巳
太子中舍胡德冲坐賊棄市夏六月丙申發粟振河中
饑是月淮溢入泗州城安陽河溢竝壞民居秋八月戊
子陳州貢芝草一本四十九莖九月癸亥命義成軍節
度使曹彬爲西南路行營馬步軍戰權都部署山南東
道節度使潘美爲都監潁州團練使曹翰爲先鋒都指

揮使將兵十萬出荆南以伐江南將行召曹彬潘美戒之曰城陷之日慎無殺戮設若困鬪則李煜一門不可加害冬十月甲子宰臣薛居正等上新編五代史十二月己巳左拾遺劉祺坐受賂黥面杖配沙門島是歲南丹州蠻酋長莫洪璿內附占城大食三佛齊來貢

八年春正月乙酉帝御長春殿謂宰相曰朕觀爲臣者比多不能有終豈忠孝薄無以享厚福耶宰相薛居正等頓首謝三月己亥契丹遣克沙骨慎思以書來結成夏五月甲午褒封丁璉父部領爲交趾郡王六月甲子雩出柳歷東壁三月乃滅秋七月辛未朔日有食之庚

辰遣閣門使郝崇信太常丞呂端使契丹八月壬戌契
丹遣耶律霸德等致御衣玉帶名馬九月壬申狩近郊
逐兕馬蹶墮地因引佩刀刺馬殺之旣而悔之曰吾爲
天下主輕事畋獵又何罪馬哉自是遂不復獵冬十月
辛亥詔郡國令佐察民有孝弟力田奇才異行或文武
可用者遣詣闕十一月乙未曹彬克昇州俘國主李煜
其相陳喬自經死江南平凡得州十九軍三縣一百八
十戶六十五萬五千六十帝曰寓縣分割民受其禍攻
城之際必有橫羅鋒刃者寔可哀也命出米十萬振之
十二月甲子契丹遣使來賀正旦自是歲交遣使生辰

亦然是歲大食三佛齊來貢

九年春正月乙亥封李煜爲違命侯庚辰詔郊西京曰
定鼎洛邑我之西都燔柴泰壇國之大事况削平江表
底定南方惟率土之混同自上天之鑒祐內慙濟德感
是洪休得不罄以恭虔申其告謝睠維京而西顧兆陽
位於南郊豆籩陳有楚之儀黍稷奉惟馨之薦朕今暫
幸西京取四月內選日有事於園丘宜令有司各揚其
職禮容儀衛典故在焉祇事肅成無或煩擾諸道州府
不得以進奉爲名輒有率斂凡在中外當體予懷二月
庚戌以曹彬爲樞密使己未吳越國王錢俶偕子惟濬

等來朝三月癸酉子德芳授貴州防禦使丙子帝幸西
京夏四月庚子祀園丘大赦耆老相謂曰我輩少經亂
離不圖今日復觀太平天子儀衛辛亥帝至自西京丙
寅大食來貢六月乙卯熒惑入南斗秋八月辛丑太子
中允郭思齊坐賊棄市丁未遣侍衛馬軍都指揮使党
進宣徽北院使潘美率兵伐北漢九月庚午高麗來貢
冬十月癸丑夕帝崩在位十七年年五十帝孝及節儉
不事矯飾初頗好微行或諫其輕出曰帝王之興自有
天命周世宗見諸將方面大耳者皆殺之我終日侍側
不能害也旣而微行愈數有諫輒曰有天命者任自爲

之不汝禁也一日罷朝坐便殿不樂者久之左右請其故曰爾謂爲天子容易耶早作乘快誤決一事故不樂耳汴京新宮成御正殿坐令洞開諸門曰此如我心少有邪曲人皆見之吳越錢俶來朝自宰相以下咸請留俶而取其地帝不聽遣歸國及辭取羣臣留俶章疏數十軸封識遺俶戒以途中密觀俶感懼江南平遂乞納土南漢劉鋹好置醢以毒臣下旣歸朝從幸講武池帝酌卮酒賜鋹鋹疑捧杯泣曰臣罪在不赦陛下旣待臣以不死願爲大梁布衣觀太平之盛帝咲謂之曰朕惟赤心於人腹中寧肯爾耶卽取鋹酒自飲別酌以賜鋹

王彥昇擅殺韓通雖預佐命終身不與節鉞王全斌貪
恣殺降雖有大功卽加貶絀官中葦簾緣用青布常服
之衣澣濯至再魏國長公主壻飾翠羽教之曰汝生長
富貴當念惜福見孟昶寶裝溺器捧而碎之曰所爲如
是不亡何待晚好讀書嘗讀二典歎曰堯舜之罪四凶
只從投竄何近代法網之密乎乾德四年召寶儀等詰之對曰
入內帝見其鏡背有志乾德四年召寶儀等詰之對曰
此必蜀物蜀主嘗有此號乃大喜曰作相須讀書人由
是大重儒者受命杜太后傳位太宗太宗嘗病亟帝親
爲灼艾太宗覺痛帝亦取艾自灸每對近臣言太宗龍

行虎步他日必爲太平天子福德吾所不及云太宗卽位之二年上尊諡曰英武聖文神德皇帝廟號太祖天禧元年加今諡

論曰唐太史令李淳風有言天之所命人不能違信哉周世宗鑒近代促運悉誅戮諸將豐貌者自謂無遺慮然天下竟歸於終日侍側之點檢此豈非天耶夫剝必復蹇必解五季之亂乃天悔禍時也宋太祖誕生寔應明宗之祝陳橋推戴夫烏得而辭諸逮天下既定傳位有盟先其弟而後其子雖素敦友于重違母命嬰之晉王知略孰與武功乎夫帝之心非利天下灼然著矣野

史氏乃言其興以謀又言晚渝盟故崩于弑皆弗綜其
事實茲述本紀闕之母令開創賢辟蒙訾議焉

宋史新編卷二

宋史新編卷二

本紀二

明南京戶部主事莆田柯維騏著

太宗

太宗至仁應道神功聖德睿烈大明廣孝皇帝諱炁初名匡義改賜光義卽位之二年改今諱宣祖第三子也初杜太后夢神人捧日以授已而有娠遂以晉天福四年十月十七日生帝於浚儀官舍帝幼不羣及長隆準龍顏望之知爲大人工文業多藝能仕周至供奉官都知太祖卽位爲殿前都虞候領睦州防禦使親征澤潞帝以大內點檢留鎮尋領泰寧軍節度使征李重進爲

大內都部署加同平章事行開封尹再加兼中書令征
太原改東都留守別賜門戟封晉王班宰相上開寶九
年冬十月癸丑太祖崩帝卽位乙卯大赦詔先帝創業
垂二十年事爲之防曲爲之制紀律已定物有其常謹
當遵承不敢踰越庚申以弟廷美爲開封尹封齊王先
帝子德昭封武功郡王德芳爲興元尹以盧多遜爲中
書侍郎同中書門下平章事楚昭輔爲樞密使薛居正
沈倫及中外官進秩有差十一月庚午詔諸道轉運使
察州縣官吏能否第爲三等歲終以聞十二月己亥大
赦改是歲爲太平興國元年己未幸講武池遂幸玉津

園自是歲屢幸

二年春正月丙寅禁居官出使者行商賈事辛未詔曰
虞書考績爰及三年漢官奏課聿分九等應諸道州府
曹掾及縣令簿尉先是吏部南曹給印紙曆子俾州縣
長吏書其績用過僭秩滿有司詳視而差其殿最斯舊
章也執事者其申明之母或蔽欺以紊經制是月開科
取士帝嘗謂侍臣曰朕欲博求俊彥於科場中非敢望
拔十得五止得一二亦可爲致治之具矣夏四月乙卯
葬太祖于永昌陵五月癸亥向拱張永德張美劉廷讓
皆罷卽鎮爲諸衛上將軍甲戌以生日爲乾明節秋七

月庚午詔諸庫藏敢變權衡以取羨餘者死閏月巳酉
河溢開封等八縣害稼八月陝澶道忠壽諸州大水九
月辛亥幸講武臺大閱丙辰符近郊自是歲屢幸是月
興州江水溢汴水溢濮州大水冬十月分左藏北庫爲
內藏庫帝謂左右曰朕置內庫蓋慮司計之臣不能節
約異時用度有闕復當賦率於民朕終不以此自供嗜
好也十一月丁亥朔日有食之旣是歲泉州陳洪進吳
越國王子錢惟濬來朝勃泥占城大食黎州兩林蠻來
貢

三年春二月辛未幸崇文院三月乙酉朔貝州清河民

田祚十世同居詔旌門閭復其家己酉吳越國王錢俶
來朝是月壽州甘露降迄至道甘露降凡十有八夏四
月己卯陳洪進獻漳泉二州凡得縣十四戶十五萬一
千九百七十八兵萬八千七百二十七辛巳侍御史趙
承嗣坐監征欺隱棄市癸未以陳洪進爲武寧軍節度
使同平章事五月乙酉錢俶獻兩浙諸州凡得州十三
軍一縣八十六戶五十五萬六百八十兵一十一萬五
千三十六丁亥封錢俶爲淮海國王是月夏州李克叡
卒子繼筠嗣六月癸未詔職官贓罪雖會赦不得敘著
爲令秋七月壬辰右千牛衛上將軍李煜卒戊戌金鄉

縣民李光襲十世同居詔旌其門壬子中書舍人李知古坐受賕改刑部所定法杖殺之八月癸丑滑州黃河清冬十月辛酉復曲阜襲封文宣公家十一月丙申祀天地于園丘大赦百官上尊號是歲占城高麗夷州蠻來貢

四年春正月庚寅命宣徽南院使潘美爲北路都招討制置使河陽軍節度使崔彥進彰德軍節度使李漢瓊彰信軍節度使劉遇桂州觀察使曹翰副之侍衛馬軍都虞候米信步軍都虞候田重進爲行營指揮使並將兵伐北漢以西上閣門使郭守文順州團練使梁迥監

護之辛卯命雲州觀察使郭進爲太原石嶺關都部署以防契丹癸巳置簽書樞密院事以石熙載爲之癸卯新渾儀成二月壬子幸國子監自是歲屢幸甲子帝親征北漢三月乙未郭進大破契丹援兵于關南夏四月庚戌以石熙載爲樞密副使辛未帝幸太原城五月甲申北漢主劉繼元降北漢平凡得州十縣四十戶三萬五千二百二十巳丑以劉繼元爲右衛上將軍彭城郡公帝作平晉詩令從臣和辛卯劉繼元獻官妓百餘以賜將校六月庚申帝伐契丹秋七月癸未帝督諸軍及契丹戰于高粱河敗績自是和好遂絕語在遼國傳甲

申班師乙巳帝至自范陽是月夏州李繼筠卒弟繼捧嗣八月壬子西京留守石守信坐從征失律貶甲戌武功郡王德昭自殺冬十月乙亥賞平北漢功廷美進封秦王潘美等進秩有差是歲占城山後兩林蠻來貢

五年春三月己丑左監門衛上將軍劉鋹卒秋七月丁未以黎桓亂交州命蘭州團練使孫全興八作使張濬左監門衛將軍崔亮爲行營部署出邕州寧州刺史劉澄軍器庫副使賈湜閤門祗候王僕爲行營部署出廉州各以其衆致討冬十一月己酉帝伐契丹癸丑帝次關南與契丹戰大破之戊午諸軍及契丹大戰于莫州

敗績十二月乙酉帝至自大名府是歲交州黎桓兩遣使爲丁璿上表求襲位不報回鶻高麗西南蕃并諸州蠻來貢

六年春二月詔曰朝廷申勸懲之道立經久之規應羣臣掌事外州悉給御前印紙所貴善惡無隱殿最必書俾因滿秩之時用行考績之典如聞官吏頗紊綱條朋黨比周迭相容蔽米鹽細碎妄有指言蠹有巨而不章勞雖微而必錄有司據文而校件析以聞志旣切於澄清恩或由於僥倖成命不返蓋示信以當然出令惟行於垂勸而安在宜行戒諭用儆因循自今應出使臣僚

在任日勞績非尤異者不得批書曾有殿犯不得引匿其餘經常事不在批書之限三月己酉興元尹德芳薨壬戌交州行營破賊于白藤江口知邕州侯仁寶死之會炎瘴軍士多死者詔班師斬劉澄賈湜于軍中徵孫全興下獄夏六月甲戌同平章事薛居正卒秋九月乙未朔日有食之甲辰左拾遺田錫上疏極諫詔嘉獎之辛亥以趙普爲司徒兼侍中石熙載爲樞密使冬十一月丁酉監察御史張白坐贓棄市辛亥祀天地于園丘大赦百官上尊號丁巳孫全興以失律棄市辛酉楚昭輔罷爲左驍衛上將軍是歲高昌女真回鶻來貢

七年春正月壬戌詔定輿服等差及婚娶喪葬儀制三月癸巳朔日有食之乙未罷秦王廷美爲西京留守乙巳交州以王師致討遣使來謝夏四月甲子以竇侖郭贊並參知政事柴禹錫兼樞密副使丁丑西京留守秦王廷美罷歸第同平章事盧多遜褫職流崖州并徙其家庚辰沈倫罷爲工部尚書五月巳酉夏州留後李繼捧歸朝獻銀夏綬宥四州丙辰秦王廷美降涪陵縣公房州安置六月乙亥遣使發李繼捧親屬赴闕其弟繼遷奔地斤澤秋七月甲午以子德崇封衛王德明封廣平郡王九月壬子契丹主賢卒子隆緒立冬十月巳卯

參知政事實併卒癸卯乾元曆成十一月己酉以李繼
捧爲彰德軍節度使十二月戊午朔日有食之是歲淮
漢諸水溢關陝諸州大水陽穀縣蝗占城獻馴象

八年春正月戊寅曹彬罷爲天平軍節度使己卯以王
顯弭德超並兼樞密副使二月戊子朔日有食之三月
庚申以宋琪參知政事夏四月壬寅班外官戒諭辭壬
子流弭德超于瓊州并徙其家五月丁卯交州黎桓自
稱留後遣使來貢并上丁璿讓表詔不允語在交趾傳
是月河決滑州過澶濮曹濟東南入于淮六月己亥以
王顯爲樞密使己酉兗州太山父老及瑕丘等七縣民

詣闕請封禪是月穀洛漚澗溢壞官民廬舍溺死者以
萬計鞏縣壞殆盡秋七月辛未郭贇罷為祕書少監庚
辰以李昉參知政事八月庚戌石熙載罷為尚書右僕
射是月詔曰朕選用羣才升良衆職九品之賤一命之
微未嘗專委於有司必須召對於便殿親與之語以勸
其能倘敷納而可觀必越次而命賞靡容僥倖庶協澄
清自今應親臨選擢官吏竝送中書更審內履歷別聽
進止是秋河江漢滹沱睢諸水皆溢為患冬十月戊戌
改子德崇名元佐德明名元祐德昌名元休德嚴名元
雋德和名元傑己酉進元佐為楚王元祐陳王封元休

韓王元雋冀王元傑益王趙普罷爲武勝軍節度使十一月壬子朔以宋琪李昉竝同中書門下平章事壬申以李穆呂蒙正李至竝參知政事張齊賢王沔竝同簽書樞密院事十二月滑州河復決是歲溪錦敘富四州蠻來附占城山後兩林蠻來貢

雍熙元年春正月壬戌購逸書丁卯前秦王廷美卒于房州癸酉參知政事李穆卒三月丁巳塞滑州決河帝作平河歌賜近臣蠲水所及州縣今年租是月十五日詔宰相近臣賞花於後苑帝曰春氣暄和萬物暢茂四方無事朕以天下之樂爲樂宜令侍從詞臣各賦詩帝

習射于水心殿夏四月乙酉泰山父老詣闕請封禪戊
子羣臣三上表請許之五月丁丑乾元文明二殿災六
月丁亥詔求直言壬寅詔罷封泰山冬十月甲申賜華
山隱士陳搏號希夷先生癸巳嵐州獻牝獸一角并瑞
物六十三種圖付史館十一月丁巳祀天地于圜丘大
赦改元十二月壬辰立德妃李氏爲皇后丙申詔曰王
者賜酺推恩與衆共樂所以表升平之盛事契億兆之
歡心累朝以來此事久廢蓋逢多故莫舉舊章今四海
混同萬民康泰嚴禋始畢慶澤均行宜令士庶之情共
慶休明之運可賜京師酺三日是歲諷茲高麗來貢

二年春二月乙未夏州李繼遷誘殺汝州團練使曹光
實夏四月乙亥朔遣使諸州振饑及察官吏能否丙子
詔宰相以下宴後苑賞花釣魚命羣臣賦詩習射其後
賞花曲宴遂爲故事己丑殿前承旨王著坐賊棄市秋
八月癸酉朔遣使按問諸路刑獄仍察官吏勤惰以聞
帝曰朕於獄犴之寄夙夜焦勞慮有冤滯耳九月庚戌
楚王宮火辛亥廢楚王元佐爲庶人是月右羽林統軍
周保權卒冬十月辛丑朔親錄京城繫囚遂至日旰近
臣諫苦勞過甚帝曰儻惠及無告使獄訟平允不致枉
濫朕意深以爲適何勞之有詳見刑法志十一月壬午

待近郊詔曰夫順時蒐狩禮有舊章非樂畋遊將獻宗廟久隳前制缺孰甚焉爰遵時令暫待近郊旣躬獲禽用以薦俎其今月十一日畋獵親射所獲田禽並付所司以備大廟四時薦享著爲令十二月庚子朔日有食之丙辰宋琪罷爲刑部尚書柴禹錫罷爲左驍衛大將軍是歲交趾占城西南蕃黎州邛部蠻來貢

三年春正月己丑知雄州賀令圖等請伐契丹取燕薊故地庚寅以天平軍節度使曹彬爲幽州道行營前軍馬步水陸都部署河陽三城節度使崖彥進副之彰化軍節度使朱信爲西北道都部署沙州觀察使杜彥圭

副之率兵出雄州靜難軍節度使田重進爲定州路都
部署率兵出飛狐茂茂卒至罷爲禮部侍郎二月壬子
命忠武軍節度使潘美爲雲應朔等州都部署雲州觀
察使楊業副之出鴈門三月癸酉曹彬與契丹戰固安
南克其城丁丑潘美追破于寰州其刺史趙彥辛以城
降辛巳曹彬克涿州潘美圍朔州其節度副使趙希贊
以城降癸未田重進戰飛狐北獲其招安使大鵬翼等
乙酉曹彬敗契丹兵于涿州南殺其相賀斯丁亥潘美
師至應州其節度副使艾正等以城降辛卯田重進攻
飛狐其守將呂行德等以城降丙申進圍靈丘其守將

穆超以城降是月武寧軍節度使陳洪進卒夏四月己酉田重進戰飛狐北再破之殺其二將乙卯田重進至蔚州其牙校殺大將以城降五月庚午曹彬之師大敗于岐溝關丙子契丹十萬衆復陷寰州楊業力戰爲所獲死之六月戊戌朔日有食之甲辰以辛仲甫參知政事秋七月庚午曹彬崔彥進朱信杜彥圭以失律貶丁亥張齊賢出知代州甲午詔改元祐名爲元僖元休爲元侃元雋爲元份八月丁酉以王沔張宏爲樞密副使丁未遣使振劍州饑因督捕諸州盜賊辛亥潘美以失律貶楊業追贈之冬十月甲辰以陳王元僖爲開封尹

庚申詔以交趾黎桓爲靜海軍節度使十二月壬寅瀛
州部署劉廷讓與契丹戰君子館收績先鋒將賀令圖
被執別將楊重進死之是歲司門員外郎王延範等坐
謀不軌棄市壽州大水濮州蝗占城高麗來貢

四年春三月庚辰詔申嚴考績夏四月己亥張宏罷爲
御史中丞以趙昌言爲樞密副使是月詔諸州郡暑月
恤繫囚如開寶之令

端拱元年春正月乙亥親耕籍田大赦改元是月澶州
黃河清二月庚子進封元僖許王元侃襄王元份越王
奉昉罷爲尚書右僕射以趙普呂蒙正並同中書門下

平章事王沔參知政事張宏爲樞密副使乙巳以楊守
一簽書樞密院事庚戌子元偓封徐國公元偁封涇國
公三月甲戌貶趙昌言爲崇信軍行軍司馬夏五月辛
酉置祕閣帝謂祕書監李至曰朕無他好但喜讀書多
見古今成敗善者從之不善者改之辛未感德軍節度
使李繼捧賜姓趙名保忠明日改定難軍節度使秋八
月戊寅鄧王錢俶卒庚辰幸國子監學官李覺講周易
賜帛百匹九月乙酉簽書樞密楊守一卒冬十月詔罷
游獵五坊所蓄鷹犬並放之諸州毋以爲獻十二月辛
未以夏州蕃落使李繼遷爲銀州刺史充洛苑使是歲

交趾高麗來貢

二年夏五月戊戌以旱慮囚遣使決諸道獄是夕雨秋
七月甲申以張齊賢爲樞密副使張遜簽書樞密院事
戊子彗出東井上避正殿減常膳八月丙辰大赦是夕
彗滅冬十月辛未以歲旱彗星見詔曰朕以身爲犧牲
焚於烈火亦未足以答謝天譴當與卿等審刑政之闕
失稼穡之艱難恤物安人以祈玄祐十二月辛酉詔尊
號去文武二字是歲三佛齊邛部蠻來貢

淳化元年春正月戊寅朔赦畿內改元受尊號改乾明
節爲壽寧節戊子趙普罷爲西京留守夏四月甲寅詔

大臣各舉轉運使及知州通判五溪蠻田漢權來附六月庚午太白晝見秋七月丁丑太白復見冬十月乙丑知白州蔣元振知須城縣姚益恭竝以清幹聞下詔褒諭賜粟帛十一月戊戌太白晝見是歲京師諸路大饑河陽洪吉江蘄諸州大水振之占城高麗交趾西南蕃來貢

二年春二月癸丑盡易宮殿綵繪以赭堊監察御史祖吉坐賊棄市閏月辛未朔日有食之己丑詔開封府捕京城蒲博犯者斬三月乙丑辛仲甫罷知陳州己巳以歲蝗旱禱弗應手詔宰相朕將自焚以答天譴翌日雨

蝗盡死夏四月庚午罷端州貢覲辛巳張宏罷爲吏部
侍郎以張齊賢陳恕並參知政事張遜溫仲舒寇準並
爲樞密副使是月河湔虞鄉等七縣民饑五月庚子置
諸路提點刑獄官丙辰左正言謝泌以敢言擢右司諫
賜金紫錢三十萬六月乙酉汴水決浚儀縣帝親督衛
士塞之秋七月巳亥詔陝西緣邊諸州饑民鬻子女入
近界部落者官贖之李繼遷奉表請降以爲銀州觀察
使賜姓趙名保吉八月巳卯置審刑院九月丁酉王沔
罷爲戶部侍郎陳恕罷爲給事中巳亥呂蒙正罷爲吏
部尚書以李昉張齊賢並同中書門下平章事賈黃中

李沆竝參知政事帝飛白書玉堂之署賜翰林承旨蘇
易簡癸卯王顯罷爲崇信軍節度觀察使甲辰以張遜
知樞密院事溫仲舒寇準竝同知院事冬十一月乙巳
罷京城內外力役土功十二月癸未保康軍節度使劉
繼元卒是歲州郡三十二旱邛部蠻來貢女真乞師伐
契丹不許自是不復通貢

三年春正月乙巳詔常參官舉可任升朝官者丙午詔
宰相待從舉可任轉運使者乙卯京師雨土語在五行
志二月乙丑朔日有食之夏四月癸未上作刑政稼穡
詩賜近臣五月丁未戶部郎中田錫殿中丞郭渭坐檮

留州獄竝責州團練副使不簽署州事戊申命醫視京城病者賜錢五十萬且藥中黃門按視之六月辛卯置常平倉秋八月壬申召終南隱士种放不至冬十月詔諸道轉運使察舉所部官吏有治績者各以名聞當召對增秩其貪猥不職者竝備狀來上當行貶斥十一月己亥許王元僖卒是歲許汝等八州蝗洛水溢潤州丹徒縣大饑閭婆占城高麗西南蕃來貢

四年春正月辛卯祀天地于園丘以宣祖太祖配大赦二月己未朔日有食之壬戌雨雪大寒優恤城中民孤老貧窮者乙丑封交州黎桓爲交趾郡王己卯以江浙

淮陝饑詔分遣近臣巡撫有可惠民者得便宜行事吏
罷軟苛刻者上之詔令未便者附傳以聞丙戌青城民
王小波聚衆爲亂殺彭山縣令齊元振夏六月丙寅張
齊賢罷爲尚書左丞壬申寇準罷爲左諫議大夫張遜
貶右領軍衛將軍以柴禹錫知樞密院事呂端參知政
事劉昌言同知樞密院事秋八月丙辰朔日有食之九
月丙午命侍從舉才堪五千戶以上縣令各二人自七
月雨至是不止河溢壞澶州江溢陷涪州詔溺死者給
斂具仍發廩以振冬十月辛未李昉罷爲尚書右僕射
賈黃中李沆罷爲給事中溫仲舒罷爲右諫議大夫以

呂蒙正同中書門下平章事蘇易簡參知政事趙鐸向
敏中竝同知樞密院事十丑以趙昌言參知政事十二
月戊申西川都巡檢使張玘與盜王小波戰死之小波
中流矢死衆推其黨李順爲帥是歲高麗來貢

五年春正月癸酉命侍衛馬軍都指揮使李繼隆爲河
西行營都部署討李繼遷甲戌命昭宣使王繼恩爲兩
川招安使討李順二月己酉元傑徙封吳王三月乙亥
趙保忠爲趙保吉所襲奔還夏州指揮使趙光嗣執以
獻李繼隆帥師入夏州夏四月甲申削趙保吉姓名五
月丁巳西川行營破賊復成都獲李順誥在王繼恩傳

李順黨張餘復攻陷八州開州監軍秦傳序死之內寅
封趙保忠宥罪侯庚辰初伏帝親書綾扇賜近臣六月
戊申高麗乞師伐契丹不許秋七月乙亥李繼遷遣使
來貢八月辛丑詔遣知益州張詠赴部得便宜從事九
月壬申以襄王元侃爲開封戶改封壽王乙亥以寇準
參知政事冬十一月丙辰賜近臣飛白書丙寅幸國子
監賜直講孫奭緋魚因幸武成王廟復幸國子監令奭
講尚書賜束帛十二月戊寅朔日當食雲陰不見侍臣
稱賀是歲交趾大食來貢

至道元年春正月戊申朔改元赦畿內癸亥趙昌言罷

知鳳翔府戊辰劉昌言罷爲給事中以錢若水同知樞密院事甲戌李繼遷遣使以良馬橐駝來獻二月丙午嘉州臣賊帥張餘首送西川行營其黨悉平夏四月癸未呂蒙正罷爲右僕射柴禹錫罷知涇州蘇易簡罷知鄧州以呂端同中書門下平章事張洎參知政事趙鎔知樞密院事乙酉契丹寇雄州甲辰開寶皇后宋氏崩六月乙酉購求圖書丙戌遣使諭李繼遷授鄜州節度使不奉詔秋八月壬辰詔立壽王元侃爲皇太子改名恒兼判開封府大赦文武常參官子爲父後者賜勳一轉癸巳以尚書左丞李至禮部尚書李沆並兼太子賓

客九月庚午李繼遷寇清遠軍冬十一月以峰州團練使上官正右諫議大夫雷有終竝爲西川招安使召王繼恩歸闕是歲占城涼州吐蕃西南蕃犍牂諸蠻來貢詔封西南蕃王龍漢璚爲歸化王

二年春正月辛亥祀天地于園丘大赦二月庚辰以李昌齡參知政事夏四月甲戌命侍衛馬軍都指揮使李繼隆爲環慶等州都部署殿前都虞候范廷召副之將兵討李繼遷秋七月甲寅寇準罷爲給事中九月丙戌秦晉諸州地晝夜十二震冬十二月大有年是歲處州稻再熟

三年春正月丙子張洎罷爲刑部侍郎以溫仲舒王化基並參知政事李惟清同知樞密院事乙酉葬孝章宋皇后于永昌陵二月辛丑帝不豫壬戌大食來貢三月丁卯占城來貢癸巳詔皇太子柩前卽位是日帝崩在位二十二年年五十九六月眞宗上尊諡曰神功聖德文武皇帝廟號太宗天禧元年加今諡

論曰藝祖受禪十有七年次第削平諸國獨太原猶負固吳越漳泉未納土竟賴太宗之沉謀睿斷區宇混同雖不得志於幽燕而繼述之業亦云弘矣且畏天憫人好文納諫昭儉防淫所以循家法而培國基者日兢兢

焉卒而五兵不試百穀屢豐非太平之效耶惜大行在
殞不踰年改元宋后之崩成喪涪陵武功並不得其
死謂先帝何嗚呼是無怪者有疑於受遺之際也

宋史新編卷二

宋史新編卷三

本紀三

明南京戶部主事莆田柯維騏著

眞宗

眞宗膺符稽古神功讓德文明武定章聖元孝皇帝諱
恒太宗第三子也母賢妃李氏是爲元德皇后乾德五
年五星聚奎明年妃得異夢以十二月二日生帝于開
封府邸赤光照室足左指有文成天字幼英傑姿表特
異比就學受經一覽成誦初名德昌太平興國八年授
檢校太保同中書門下平章事封韓王改名元休端拱
元年封襄王改元侃淳化五年封壽王加太傅開封尹

至道元年立爲皇太子改今諱仍判府事故事殿廬幄
次在宰相上宮僚稱臣皆推讓弗受見賓客李至李沆
必先拜迎送降階及門開封政務填委帝留心獄訟京
獄屢空太宗屢詔嘉美三年三月太宗崩帝卽位夏四
月乙未尊皇后爲皇太后赦天下癸卯宰相呂端加右
僕射弟元份元傑元偓元偁元儼等並進封有差甲辰
以李至李沆並參知政事丁未中外羣臣進秩一等乙
卯進封交趾黎桓爲南平王五月甲戌參知政事李昌
齡貶丁亥立郭氏爲皇后六月辛丑詔罷獻祥瑞乙巳
錢若水請罷許之以爲集賢院學士是月追復涪王廷

美爲秦王復封兄元佐爲楚王秋八月己亥趙鎔罷爲
壽州觀察使李惟清罷爲御史中丞以曹彬爲樞密使
向敏中夏侯嶠並爲樞密副使庚子以生日爲承天節
己酉封乳母齊國夫人劉氏爲秦國延壽保聖夫人庚
申西川廣武卒劉旰作亂掠諸州招安使上官正鈐轄
馬知節討平之冬十月己酉葬太宗于永熙陵十二月
丙申追尊母賢妃李氏爲皇太后辛丑詔諸路轉運使
飭長吏勸農甲辰復趙保吉姓名授定難軍節度使

咸平元年春正月丁丑召學官崔頤正講書因命宰臣
選明經術者以聞甲申彗出營室北二月癸巳宰臣呂

端等言彗出之應當在齊魯分帝曰朕以天下爲憂豈直一方耶甲午詔求直言避殿減膳乙未慮囚丁酉彗滅三月復開進士諸科淳化末停貢舉者五年至是復焉夏四月壬寅趙保吉遣弟繼瑗入謝巳酉遣使按天下吏民逋負悉除之是月平戎軍甘露降迄天禧甘露降凡七十有一五月戊午朔日有食之六月辛卯詔近臣舉常參官才堪轉運使者丙辰以旱免開封二十五州軍田租秋九月壬申賜終南隱士种放粟帛緡錢冬十月丙戌朔日有食之戊子呂端罷爲太子太保李至罷爲武勝軍節度使以張齊賢李沆竝同中書門下平

章事已丑溫仲舒罷知河陽夏侯嶠罷爲戶部侍郎以
向敏中參知政事楊礪宋湜並爲樞密副使丙午許羣
臣獻著述令兩制銓簡十二月癸卯詔三司判官舉才
堪知州者各一人是歲吐蕃首領來朝獻馬二千匹甘
州回鶻西南蕃黎州山後蠻來貢定州雹傷稼振之

二年春正月甲子詔侍從舉升朝官可守大郡者各一
人二月己酉戒百官比周奔競有弗率者御史臺糾之
三月丁亥帝以久旱諭宰相曰凡政有闕失宜相規以
道毋惜直言夏六月戊午樞密使曹彬卒秋七月甲申
給外任官職田己丑以王顯爲樞密使甲辰幸國子監

學官崔倕佺講尚書還幸崇文院各賜賚有差八月丙寅大閱於東北郊癸酉樞密副使楊礪卒九月庚辰朔日有食之是月契丹大舉入寇冬十月壬子宜州執溪峒蠻酋三十餘人詣闕詔釋其罪遣還十一月丙戌祀天地于園丘以太祖太宗配大赦百官上尊號是月詔親征契丹所次頓舍給用毋泛及州縣以周瑩爲駕前軍都部署石保吉爲行營先鋒都部署魏咸信爲貝冀行營都部署李沆爲東京留守十二月甲寅駕發京師甲子次大名躬御鎧甲於中軍契丹攻威虜軍本軍擊敗之是歲沙州蕃族首領邛部川蠻西南蕃占城大食

來貢江浙廣南荆湖旱嵐州春霜害稼竝振之

三年春正月癸未契丹犯河間高陽關都部署康保裔死之乙酉忠武軍節度使傅潛都鈐轄張昭允竝坐失律削官流遠州丁亥高陽關具冀路都部署范廷召等追敗契丹於莫州壬辰樞密副使宋湜卒甲午益州兵亂害鈐轄符昭壽逐知州牛冕等推都虞候王均爲首詔戶部使雷有終爲瀘州觀察使兼川峽招安使會巡檢使李惠等討之庚子帝至自大名府二月辛酉詔從臣各舉升朝官才堪邊任者一人癸亥王顯罷知定州以周瑩王繼英竝知樞密院事王旦同知樞密院事丁

卯益州王均開城僞遁雷有終等入城兵敗退保漢州
李惠死之丙子賞花苑中召從臣宴射帝作賞花釣魚
詩從臣皆賦三月戊寅朔日有食之夏四月乙卯葬元
德李皇后于永熙陵冬十月雷有終大敗賊黨復益州
王均走死有終等進秩有差十一月壬午詔羣臣盡言
無諱常參官轉對如故事未預次對者聽封事以聞丙
申張齊賢罷爲兵部尚書十二月戊申符近郊以所獲
獻廟歲以爲常是歲大食高麗高州蠻來貢畿內江南
荆湖旱果閬州水竝振之

四年春二月丙寅詔從臣各舉賢良方正直言敢諫一

人三月丁亥風霾帝謂宰相曰卿等思闕政以佐予治
李沆等乞免官不許庚寅以呂蒙正向敏中竝同中書
門下平章事司天監進儀天曆辛卯王化基罷知揚州
以王旦參知政事馮拯陳堯叟竝同知樞密院事夏四
月己未以王欽若參知政事五月戊子亳州貢白兔還
之六月癸卯汰天下冗吏十九萬六千人丁卯詔頒九
經千州縣學校及聚徒講誦之所戊申出陣圖示宰相
命督將練士以備北邊秋八月戊申以契丹謀入寇出
地圖險要示宰相議戰守方略九月趙保吉復叛陷清
遠軍冬十一月壬申知階州竇玘獻白鷹還之鎮定高

陽關都部署王顯奏契丹入寇大破之十二月丙寅太白晝見南斗是歲丹眉流龜茲撫水州蠻來貢夏州蕃族訛遇等先後內附河北饑梓州水竝振之

五年春正月壬戌環慶部署張凝襲焚諸蕃族帳二百斬首五千降千人三月丁酉趙保吉陷靈州知州裴濟死之庚戌比部員外郎洪湛坐同王欽若知舉事敗流信州工部尚書趙昌言知雜御史范正辭竝坐故入欽若貶夏五月代州進士李光輔善擊劍詣闕帝曰若獎用之民悉好劍矣遣還六月己卯周瑩罷爲高陽關都部署是月都城大雨壞廬舍振恤壓死者之家秋七月

甲午朔日有食之八月乙酉河西蕃族拽浪南山等四百人內附九月戊申召隱士种放授左司諫賜第宅冬十月辛巳涇原部署請誅內屬蕃族數叛者九十人詔釋之丁亥向敏中罷爲戶部侍郎十一月壬寅祀天地于園丘大赦是歲沙州來貢六谷首領潘羅支等貢馬第給其直河北饑振之

六年春二月庚辰以六谷酋長潘羅支爲朔方軍節度使甲申蕃部葉市族囉哩等內附庚寅屯田員外郎盛梁坐受賕枉法流崖州三月綏州東山蕃部軍使拽白等內附夏四月契丹來侵戰望都縣副都部署王繼忠

被執以歸五月甲午太白晝見秋七月癸丑充王元傑
率八月庚午太白晝見辛未原渭等州言西蕃八部二
十族納質來附九月甲辰呂蒙正罷爲太子太師冬十
一月癸巳苦寒令諸路休役兵庚戌雨木冰甲寅有星
孛于井鬼十二月趙保吉攻西涼知府丁維清沒焉是
歲三佛齊大令西涼府暨龍野馬族來貢河北諸州大
熟

景德元年春正月丙戌朔改元大赦丙申京師地震辛
丑再震丁未又震二月潘羅支集蕃部擊趙保吉敗之
保吉中流矢死羅支使來獻捷於是保吉子德明立三

月威虜軍守將破契丹斬獲甚衆己亥皇太后李氏崩
夏五月丁巳詔諸路轉運使代還日悉條所經畫事以
聞六月壬午暑甚罷京城工役遣使賜暍者藥秋七月
丙戌同平章事李沆卒庚寅以畢士安參知政事八月
己未以畢士安寇準並同中書門下平章事王繼英爲
樞密使馮拯陳堯叟並簽書樞密院事壬申詔常參官
二人共舉州縣官可任幕職者一人九月己丑詔翰林
學士承旨宋白等舉文武官可任藩郡者各一人丁酉
以契丹入寇召宰相議親征閏月乙亥以參知政事王
欽若判天雄軍兼都部署契丹統軍撻覽率衆攻威虜

順安軍三路都部署擊敗之斬偏將復其輜重又攻北平砦及保州復爲州砦兵所敗撻覽與契丹主及其母并衆攻定州王師拒於唐河擊其游騎契丹駐陽城淀因王繼忠致書于莫州石普以講和冬十一月丙寅遣便安集河北流民庚午車駕北巡司天言日抱珥黃氣充塞契丹宜不戰而却甲戌寒甚左右進貂帽毳裘却之曰臣下皆苦寒朕安用此王繼忠數馳奏請和帝謂宰相曰河冰已合且其情多詐不可不爲之備契丹兵至瀋州北直犯前軍西陣其大帥撻覽耀兵出陣俄中伏弩死丙子帝次瀋州渡河戊寅閣門祇候曹利用使

契丹還十二月庚辰朔日有食之契丹使韓杞來甲申
契丹使姚東之來獻御衣食物曹利用竟以歲幣三十
萬定和議甲午帝發澶州乙未契丹使丁振以誓書來
丁酉契丹兵出塞戊戌帝至自澶州是歲交趾蒲端占
城大食龜茲來貢江南東西路饑陝濱棣州蝗振之

二年春正月庚戌朔以契丹講和大赦天下壬子放河
北諸州強壯歸農令有司市耕牛給之二月乙酉以交
趾有內難遣使安撫癸卯遣太子中允孫僅等使契丹
夏四月丁酉樞密直學士劉師道貶忠武軍行軍司馬
右正言知制誥陳堯咨貶單州團練使並坐知舉不公

癸卯王欽若罷爲資政殿學士以馮拯參知政事五月
戊申幸國子監秋七月甲子詔復賢良方正能直言極
諫等六科八月戊寅雍王元份卒辛丑有星孛于紫微
冬十月乙酉同平章事畢士安卒丙戌遣職方郎中韓
國華等使契丹十一月戊申詔侍從舉堪爲學官者十
人丁巳祀天地于園丘大赦癸亥宰相寇準親王元佐
等悉進爵有差癸酉契丹遣使來賀承天節自是生辰
交遣使歲爲常十二月癸未契丹遣使來賀明年正旦
自是正旦交遣使歲爲常是歲夏州西涼府邛部川蠻
來貢淮南兩浙荆湖北路饑京東蝻生閩颶風振之

三年春正月辛未置常平倉二月丁亥樞密使王繼英卒戊戌寇準罷爲刑部尚書以王旦同中書門下平章事己亥以王欽若陳堯叟並知樞密院事趙安仁參知政事韓崇訓馬知節並簽書樞密院事三月己未詔做諫臣悉心獻替夏四月丙子幸崇文院五月壬寅日當食不虧周伯星見己未渭州妙娥族三千帳內附復置高州是月知樞密院事陳堯叟父喪起復六月丙子知廣州凌策請發兵定交趾亂帝命遵前詔安撫秋七月壬子緣海安撫使邵晔上邕州至交趾水陸路及控制宜州山川等圖帝曰祖宗關土廣大惟當慎守不必貪

無用地苦勞兵力八月甲戌閱太常新集雅樂九月乙丑夏州趙德明奉表歸款冬十月庚午以趙德明爲定難軍節度使封西平王丁酉葬明德李皇后于永熙陵十一月壬寅周伯星再見是歲西涼府高溪州風琶溪峒諸蠻酋來貢京東西河北陝西饑振之

四年春正月己未車駕發京師丁卯帝素服詣諸陵二月己巳帝幸西京甲戌幸上清宮詔賜酺三日丁酉賜隱士楊璞緡帛三月己亥帝至自西京夏四月辛巳皇后郭氏崩五月丙申朔日有食之閏月丙戌詔兵部尚書張齊賢等各舉供奉官侍禁殿直有謀略武幹知邊

事者二人六月丁未司天言五星聚而伏於鶉火乙卯葬莊穆郭皇后于永熙陵秋七月甲戌宣州軍校陳進殺知州劉永規劫判官盧成均爲首詔閤門使曹利用等將兵討之辛巳以黎龍廷爲交趾郡王賜名至忠是月帝謂宰臣曰朕慮四方刑獄官吏未盡得人一夫受寃卽召災沴今軍民事務惟有轉運使且地遠無由知先帝嘗選朝臣爲諸路提點刑獄官今可復置仍以使臣副之八月庚子韓崇訓罷爲齊州防禦使壬寅幸崇文院丁巳權三司使丁謂上景德會計錄冬十月甲午朔日當食雲陰不見曹利用破賊擒盧成均斬陳進賞

立功將士有差乙巳頒試進士新格詔翰林學士晁迥
等舉常參官可知大藩者二人乙卯毀諸道官司非法
訊囚之具是歲河西六谷夏州沙州大食占城蒲端西
南蕃溪峒蠻來貢諸路大熟淮蔡間麥斗十錢粳米斛
二百

大中祥符元年春正月乙丑有天書見左承天門鵝尾
帝召羣臣拜迎于朝元殿語在禮志戊辰大赦改元賜
京師酺幽州旱求市麥種夏州饑請易粟竝許之三月
兗州父老千餘人并諸路進士文武官將校蠻夷耆壽
僧道先後詣闕請封禪不允自是表凡五上夏四月甲

午詔以十月有事于泰山乙未以知樞密院事王欽若
參知政事趙安仁爲封禪經度制置使丙申以宰相王
旦爲封禪大禮使知樞密院事陳堯叟參知政事馮拯
分掌禮儀使丙午作昭應宮五月壬戌王欽若言泰山
醴泉出錫山蒼龍見六月乙未天書再降于泰山醴泉
北辛亥羣臣上尊號秋八月乙巳黔州言磨嵯洛浦蠻
首頽龔行滿等率族二千三百人內附己酉王欽若獻
芝草八千餘本九月戊午岳州進三春茅庚辰趙安仁
獻五色金玉丹紫芝八千七百餘本冬十月庚寅五星
順行同色辛卯駕發京師扶持使奉天書先道戊申王

欽若等獻泰山芝草三萬八千餘本巳酉五色雲起嶽
頂辛亥饗昊天上帝於圓臺陳天書於左以太祖太宗
配玉牒文曰有宋嗣天子臣某敢昭告于昊天上帝啓
運大同惟宋受命太祖肇基功成治定太宗膺圖重熙
累盛粵惟冲人不承列聖寅恭奉天憂勤聽政一紀于
茲四禩來暨丕貺殊尤元符章示儲慶發祥清淨可致
時和年豐羣生成遂仰荷顧懷敢忘繼志僉議大封聿
申昭事躬陟喬嶽對越上玄率禮祇肅備物吉蠲以仁
守位以孝奉先祈福逮下侑神昭德惠綏黎元懋建皇
極天祿無疆靈休允迪萬葉其昌永保純錫壬子禪社

首如封祀儀日重輪五色雲見作會真宮癸丑受羣臣
朝賀大赦百官加恩賜天下酺三日十一月戊午幸曲
阜謁文宣王廟遂幸孔林加孔子謚追謚齊太公曰昭
烈武成王青州立廟周文公曰文憲王曲阜立廟丁卯
賜曲阜孔子廟經史丁丑帝自泰山奉天書還宮十二
月辛卯御乾元殿受尊號辛丑宰相王旦親王元佐等
悉進爵越二日王欽若張齊賢溫仲舒寇準王化基邢
昺竝進秩有差是歲契丹西涼府甘州三佛齊大食西
南蕃等遣使來賀東封諸路言歲稔米斗七八錢
二年春正月癸亥以封禪慶成賜宗室輔臣襲衣金帶

器幣庚午詔讀非聖之書及屬辭浮靡者嚴譴之三月
丙辰朔日當食陰晦不見辛未賜京城酺夏四月壬寅
詔禁中外羣臣非休暇無得羣飲廢職五月乙卯追封
孔子弟子七十二人六月甲午幸昭應宮戊戌麟府言
社慶族依唐龍鎮爲援數擾別部請出兵襲之帝曰均
吾民也不許秋七月甲寅詔右僕射張齊賢等各舉才
堪御史者一人辛未以昭應宮爲玉清昭應宮冬十一
月丙辰作文武七條戒官吏甲子詔諸路官吏蠹政害
民轉運使提點刑獄不舉察者坐之十二月辛丑三司
使丁謂上封禪朝覲祥瑞圖內臣劉承珪上天書儀仗

圖是歲于闐西涼府西南蕃羅崑州蠻來貢雄濟鳳三

州水雄州蟲兗州霖雨無爲軍大風昇州火竝振之

三年春三月壬辰交趾大校李公蘊自稱留後因封交

趾郡王夏四月辛酉賜泰山隱士秦辨號貞素先生放

還山甲戌宰相王旦知樞密院事主欽若陳堯叟竝進

秩五月壬午西涼府覓諾族瘴疫賜藥六月庚戌邊臣

言契丹饑來市糴詔雄州糴粟二萬石振之河中府父

老千餘人詣闕請祀后土不允秋七月文武官將校等

三上表請祀汾陰后土八月丁未朔詔明年春有事于

汾陰戊申以知樞密院事陳堯叟爲祀汾陰經度制置

使已酉以宰相王旦爲大禮使知樞密院事王欽若爲
禮儀使九月丁亥作宗室座右銘賜諸王甲辰內出綏
撫十六條頒江淮南安撫使冬十月辛亥契丹遣使耶
律寧來告征高麗十一月己亥陝州黃河清十二月陝
州黃河再清庚戌集賢校理晏殊獻河清頌辛酉謁王
清昭應宮己巳帝作奉天庇民述示宰相是歲龜茲占
城交趾來貢江淮旱陝西饑疫昇洪潤州火竝振之
四年春正月丁酉帝奉天書發京師二月戊申華州獻
芝草辛酉祀后土地祇是夜月重輪壬戌大赦賜天下
酺三日作汾陰配饗銘河瀆四海贊召草澤李濟劉巽

濟以疾辭授巽大理評事庚午召見隱士鄭隱李寧賜
茶藥束帛壬申宴號州父老于湖城行宮三月甲戌次
陝州召草澤魏野辭疾不至己卯次西京丙申謁諸陵
夏四月甲辰朔帝至自汾陰是月宰相親王以下進秩
有差五月癸巳詔州城置孔子廟乙未加上五嶽帝號
作奉神述六月丙寅詔授交甘等州大食蒲端三麻蘭
勿巡等國貢使官秋七月甲午馮拯罷知河南府冬十
月丁巳定江淮鹽酒價有司慮失歲課帝曰苟便於民
何顧歲入也十一月庚午占城貢獅子是歲江淮南水
畿內蝗楚秦州潮害稼京兆旱河北陝西劔南饑振之

五年春正月戊寅雨木冰壬午河決棣州三月庚戌宰相王旦等竝加特進功臣夏四月戊申以向敏中同中書門下平章事有司請違法販茶者許同居首告帝謂以利敗俗非國體不許五月戊子賜近臣金華殿所種麥六月庚申賜杭州隱士林逋粟帛秋八月丙申朔日有食之己未作五嶽觀九月戊子趙安仁罷爲兵部侍郎以王欽若陳堯叟竝爲樞密使馬知節爲樞密副使丁謂參知政事冬十月戊午延恩殿道場帝瞻九天司命天尊降是爲聖祖令天下避聖祖諱玄爲元朗爲明凡載籍偏犯者各缺其點畫尋以玄元聲相近諱玄爲

真改玄武爲直武己未大赦辛酉作崇儒術論刻石國
學閏月己巳上聖祖尊號乙亥上聖祖母懿號丙子羣
臣上尊號戊寅建景靈宮太極觀於壽丘十一月甲辰
百官悉加恩置玉清昭應宮使以王旦爲之丁未作汴
水發願文十二月戊辰作景靈宮丁亥立德妃劉氏爲
皇后是歲交趾甘州西涼府溪峒蠻來貢江淮雨浙夏
旱遣使就福建取占城早稻種教民種之諸路饑減直
鬻穀以濟流民

六年春正月癸巳朔司天言五星同色戊申禁內臣出
使預民政己酉賜京師酺五日夏五月乙卯參知政事

丁謂奉迎建安軍所鑄玉皇聖祖太祖太宗尊像至帝
展謁奉安於玉清宮六月丁卯壽丘獻紫莖金芝秋七
月癸卯禁有司稅農器巳酉亳州官吏父老詣闕請謁
太清宮許之八月辛酉以丁謂爲奉祀經度制置使庚
午加號太上老君混元上德皇帝冬十月癸酉謁玉清
昭應宮巳卯作步虛詞付道門十一月癸丑賜御史臺
九經諸史甲寅判亳州丁謂獻芝草三萬七千本十二
月戊午朔日有食之壬申獻天書於朝元殿是歲戎瀘
蠻寇平龜茲西蕃高州蠻來貢

七年春正月壬寅帝奉天書幸亳州丙午判亳州丁謂

獻白鹿一芝九萬五千本己酉朝謁太清宮是夜月重
輪含譽星見庚戌賜酺三日丙辰建應天府爲南京作
鴻慶宮二月庚申夏州趙德明遣使詣行闕朝貢辛酉
帝至自亳州壬申恭謝天地大赦三月甲午宰相親王
竝進秩丁未予受益封慶國公夏四月丙子舒王元僊
卒六月丙辰眉州通判董榮受賕繫獄長安知縣王文
龜酗酒濫刑竝投荒裔乙亥罷王欽若爲吏部尚書陳
堯叟爲戶部尚書馬知節爲潁州防禦使以寇準爲樞
密使秋七月辛丑交趾李公蘊敗鶴柘蠻遣使來獻捷
甲辰以王嗣宗曹利用竝爲樞密副使八月甲戌河決

澶州九月丙戌合舉皇再見辛卯尊上玉皇聖號曰太
上開天執符御歷含真體道玉皇大天帝辛丑幸五嶽
觀冬十一月玉清昭應宮成加王旦脩宮使十二月癸
丑朔日當食不虧丙辰詔王欽若等五人各舉京朝幕
職州縣官詳練刑典曉時務任邊寄者二人巳未作元
符觀是歲夏州西涼府高麗女其來貢河南府獄空淮
南江浙饑除其租天下戶九百五萬五千七百二十九
口二千一百九十七萬六千九百六十五

八年春正月壬午朔謁玉清昭應宮奉安刻玉天書于
寶符閣還御崇德殿受賀赦天下文武官滿三歲者許

考課以聞夏四月辛酉帝製崇儒術爲君難爲臣不易
二論賜輔臣刻石國子監壬戌寇準罷爲武勝軍節度
使以王欽若陳堯叟竝爲樞密使五月壬午榮王元儼
因事奪節降封端王六月己酉朔日有食之閏月己卯
赦天下秋七月戊午王嗣宗罷爲大同軍節度使冬十
二月辛卯子受益進封壽春郡王是歲賜信州道士張
王隨號真靜先生高麗東女真注輦回鶻占城唃廝囉
西蕃來貢坊州大雨河溢陝西饑

九年春正月丙辰置會靈觀使以丁謂爲之加刑部尚
書壬申以左諫議大夫張士遜左司諫崔遵度爲壽春

郡王友二月甲午詔以皇子就學之所名資善堂延州
蕃部饑貸以邊穀三月丙午秦州曹瑋撫捍蕃境得宜
詔嘉之乙丑著作郎高清以贓賄杖脊配沙門島夏四
月庚辰周伯星見丙申賜天下酺秋七月丙寅詔天下
羣官職田並須遵守元制無擾客戶遇災沴卽蠲省之
八月丙戌陳堯叟罷爲右僕射九月甲辰丁謂罷爲平
江軍節度使丙午以陳彭年王曾張知白並參知政事
甲寅詔督諸道捕蝗丁巳詔罷諸營造戊辰青州飛蝗
赴海死積海岸百餘里己巳定出粟振饑補官之制是
歲夏州甘州西蕃邛部山後蠻來貢諸州大水隕霜害

稼竝振之

天禧元年春正月辛丑朔改元詣玉清昭應宮薦獻上天皇大天帝寶冊衮服壬寅上聖祖寶冊己酉上太廟謚冊辛亥謝天地于南郊大赦御天安殿受冊號乙卯作欽承寶訓述示羣臣二月丁丑詔曰朕大庇烝民隆興至治彌綸闕失交屬於庶僚寤寐思賢屢頒於明詔雖增虛佇未協翹思夫惟諫諍之臣迫于風憲之列倘因循而自默則獻納以曷觀况朕躬攬萬機日披封奏詳延百執素靡漏言舉職徇公有何所避保身箝口詎至於斯將戒慢官用申誕告仍加優異以勸傾輸自今

兩省置諫官六員御史臺中丞知雜推直外置御史六員並不兼領職務每月添支錢十五貫三年內不得差出其或詔令乖當官曹涉私措置失宜刑賞踰制賦斂繁暴犴獄稽留竝令諫官奏論憲臣彈舉每月須一員奏事或有急務亦許非時入對雖言有過當必示曲全若事難顯行卽令留內但不得潛爲朋附故作中傷其諫官仍於諫院或兩省內選擇廳事竝置什器候及三年或屢有章疏實能裨益特越常例別與升遷苟或職業無聞公言罔親移授散秩仍遣監臨載念古賢不忘忠諫雖逢暴怒尚靡諂辭今則沖人渴聞讜論開懷而

待好爵斯縻是爲不諱之朝豈有犯顏之慮黜陟之典
斷在於必行語默之端亟從於自擇更資宰府宣布周
行戊寅宰相親王以下悉進秩壬午定宗室子授官之
制庚寅封交趾李公蘊爲南平郡王秦州神武軍大破
宗哥族馬波叱臘等於野吳谷巳亥參知政事陳彭年
卒秋七月丁巳王旦罷爲玉清昭應宮使八月庚午以
王欽若爲左僕射兼中書侍郎同平章事九月癸卯王
曾罷爲禮部侍郎以李迪參知政事馬知節知樞密院
事曹利用任中正周起竝同知樞密院事冬十一月辛
丑曹瑋平鬼留家族乙卯大雪帝謂宰相曰雪固豐稔

之兆第民力未充慮失播種卿等其務振勸毋遺地利
十二月丙寅京城雪寒罷工役給貧民粥瘞死者是歲
三佛齊龜茲來貢諸路蝗鎮戎軍風雹害稼並振之

二年春正月辛亥賜壽春郡王卹民歌二月丁卯壽春
郡王加太保進封昇王詔近臣舉常參官堪爲御史者
夏閏四月癸卯馬知節罷爲彰德軍觀察留後丁未靈
泉出京師飲者愈疾作祥源觀是月辰州討下溪州蠻
斬獲甚衆五月壬戌詔諸州長吏存卹孝弟力田者甲
子徐王元偓卒丁卯釋下溪州蠻彭儒猛罪六月乙巳
訛言帽妖至京師民夜叫譟達曙詔捕嘗爲邪法人耿

槩等棄市辛亥彗出北斗魁秋八月甲辰立昇王爲皇太子更名禎大赦百官加恩壬子進封元儼通王以李迪兼太子賓客癸丑作元良箴賜皇太子九月庚辰賜京師酺冬十二月張知白罷知天雄軍是歲占城甘州溪峒黎州山後蠻來貢河北京東西饑振之

三年春三月戊午朔日有食之癸未翰林學士錢惟演坐知舉失實降一官夏六月甲午王欽若罷判杭州戊戌以寇準爲中書侍郎同平章事丁謂參知政事秋七月壬申以得天書羣臣表上尊號八月丁亥大赦冬十一月辛未祀天地于圜丘大赦十二月辛卯宰相向敏

中寇準竝進秩元儼進封涇王曹利用丁謂竝爲樞密使癸巳以任中正周起竝爲樞密副使是歲富州蠻酋向光澤表納土詔却之高麗女真來貢河決滑州泛溢諸縣江浙及利州路饑竝振之

四年春正月乙丑以曹瑋簽書樞密院事庚午贈處士
魏野官賜其家粟帛二月帝不豫三月己卯同平章事
向敏中卒夏四月乙酉西南方雨月重見六月丙申寇
準罷爲太子太傅秋七月辛酉京城大雨水壞廬舍大
半丙寅以李迪爲吏部侍郎兼太子少傅同平章事馮
拯爲樞密使庚午以丁謂馮拯竝同中書門下平章事

癸酉入內都知周懷政伏誅丁丑貶寇準爲太常卿八月乙酉以任中正王曾並參知政事壬寅貶寇準爲道州司馬九月己未周起罷知青州曹瑋罷爲環慶路都部署是月大赦賜京城酺冬十月甲辰減水災州縣秋租十一月戊午召近臣於龍圖閣觀御製文詞帝曰朕聽覽之暇以翰墨自娛雖不足垂範亦平生游心於此戊辰丁謂罷知河南府李迪罷知鄆州己巳詔丁謂赴中書視事庚午詔自今除軍國大事親決餘皆委皇太子同宰相樞密使參議行以丁謂兼太子少師馮拯兼少傅曹利用兼少保十二月乙酉皇太子親政丁亥帝

不豫是歲龜茲甘州回鶻來貢

五年春正月丁酉以張士遜爲樞密副使二月甲寅審
刑院言天下無斷獄丙寅賜天下酺秋七月甲戌朔日
有食之八月壬戌熒惑犯南斗是歲吐蕃唃廝囉來降
高麗來貢蠲京東西淮浙水災民租

乾興元年春正月辛未朔改元二月庚子大赦癸卯羣
臣上尊號戊午帝大漸遺詔皇太子於柩前卽位帝是
日崩在位二十六年年五十五十月仁宗上尊諡曰文
明武定章聖元孝皇帝廟號真宗慶曆七年加今諡
論曰真宗承昇平之業黎民樂生又不識兵革一旦契

丹內侵我師弗利遂大舉乘勝抵澶州逼門庭矣帝用
寇準謀親帥六師濟河決戰竟褫其氣以歲幣定盟各
罷兵詩曰徐方旣同天子之功帝之謂也抑帝之深思
長慮詎保黠虜不吾叛耶遼史紀契丹之獵也手接飛
鴈鵠自投于地稱曰天賜祭告而夸耀之帝之崇奉天
書蓋陰寓制禦之術然其費無藝而國用爲竭豈策之
得哉豈策之得哉

宋史新編卷三